

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

- राष्ट्रपति द्रौपदी मुर्मू होर अज्ज राष्ट्रपति भवन च दरुं साबका प्रधानमंत्रिएं सनें कुल 5 हस्तिएं गी भारत रत्न सम्मान भेंट करगंन।
- उपराष्ट्रपति जगदीप धनखड़ होरें आक्खेआ ऐ जे भारत इक लोकतांत्रिक मुख्य ऐ जेहदी इक मजबूत न्यायिक बवस्था बी ऐ जेहदे कन्नै कोई समझौता नेई कीता जाई सकदा।
- उधमपुर लोकसभा सीट लेई दाखल नामांकन वापस लैने दी अज्ज खीरी तरीक ऐ।
- डोगरी दी नामवर समाचार वाचिका लज्जा मन्हास होर पूरियां होई गेइयां न।
- त्रुं दिन दा तवि लोक उत्सव कल जम्मू च शुरू होआ।
- आईपीएल च कोलकाता नाईट राईडर्स नै रॉयल चैलेंजर्स बेंगलोर गी कल 7एं विकटें कन्नै हराया।

<><><><><><>

Bharat Ratna

राष्ट्रपति द्रौपदी मुर्मू होर अज्ज राष्ट्रपति भवन च भारत रत्न पुरस्कार प्रदान करगंन। साबका प्रधानमंत्री चौधरी चरण सिंह, पी.वी.नरसिन्हा राव, बिहार दे साबका मुख्यमंत्री कर्पूरी ठाकुर ते महान वैज्ञानिक एम.एस.स्वामीनाथन होरें गी मरणोपरांत भारत रत्न दित्ता जाग। साबका उप-प्रधानमंत्री ते बीजेपी दे वरिष्ठ नेता लाल कृष्ण आडवाणी होरें गी बी देशे दे सर्वोच्च सम्मान भारत रत्न कन्नै सम्मानत कीता जाग।

<><><><><><>

Vice President

उपराष्ट्रपति जगदीप धनखड़ होरें आक्खेआ ऐ जे भारत मजबूत न्यायिक प्रणाली आला लोकतांत्रिक मुल्ख ऐ ते कोइ बी व्यक्ति जां कोई समूह न्यायिक बवस्था पर दबाह नेई बनाई सकदा। श्री धनखड़ होरें भारती लोकतंत्र गी अनोखा करार दिंदे होई आक्खेआ जे भारत गी कनून दे शासन दे बारे च कुसै कोला शासन दे बारे च कुसै कोला सबक लैने दी लोड़ नेई ऐ। उपराष्ट्रपति होर कल नमीं दिल्ली च भारती लोक प्रशासन संस्थान दे 70में स्थापना दिवस समारोह गी संबोधत करै करदे हे। उनें आक्खेआ जे कनून दे अग्गे बरोबरी अज्जै दे भारत दी पंछान ऐ। श्री धनखड़ होरें आक्खेआ जे कनून ओकड़े लोकें दी जोआबदेही तैह करै करदा ऐ जेहड़े अपने आपै गी कनून कोला उप्पर मन्नदे न। उनें भारती न्याह बवस्था गी सशक्त, जन हितैशी ते स्वतंत्र करार दित्ता।

<><><><><><>

Udhampur Seat

उधमपुर लोकसभा सीट जेहूदे लेई 19 अप्रैल गी वोट पोआए जाने न, लेई दाखल नामजदगियां वापस लैने दी अज्ज खीरी तरीक ऐ। कटुआ थमां साढ़े जिला संवाददाता नै जानकारी दित्ती ऐ जे कुल दाखल 15एं नामजदगिएं चा 3 खारज करी दित्तियां गेदियां न ते जांच पड़ताल मुकम्मल होने दे बाद फिलहाल 12 मेदवार गै चुनां मैदान च बचे दे न। ध्यानजोग ऐ जे इस सीट पर मुख मकाबला मजूदा सांसद ते केन्द्री मंत्री डॉ. जितेन्द्र सिंह ते साबका सांसद ते मंत्री, कांग्रेस दे चौधरी लाल सिंह हुंदे बश्कार ऐ। तोआई जम्मू रियासी लोकसभा सीट लेई अज्ज मजूदा सांसद ते बीजेपी मेदवार जुगल किशोर शर्मा होर अपना नामांकन दाखल करगंन।

<><><><><><>

MCC Jammu

जम्मू जिला प्रशासन क्षेत्र च निष्पक्ष ते बिना कुसै रुकावट दे चुनां करोआने आस्तै सख्त प्रयास करा'रदी ऐ ते आदर्श आचार संहिता गी बी लागू कीता गेआ ऐ। जिला चुनां अधिकारी जम्मू सचिन कुमार वैश्य होरें जानकारी दिंदे होइ आक्खेआ.....

<><><><><><>

DEO Rajouri

जिला चुनां अधिकारी राजौरी ओम प्रकाश भगत होरें कल जिले दी सुरक्षा स्थिति दा जायजा लैने आस्तै सेना ते पुलस प्रशासन कन्नै बैठक कीती जेहदे च लोकसभा चुनां 2024 आस्तै सुरक्षा प्रबंध पर चर्चा कीती गई। चुनां प्रक्रिया च कनूनी बवस्था बनाइयै रखने ते इस दरान कोई बी माड़ी घटना नेई होने देने आस्तै डीईओ होरें सीमावर्ती क्षेत्र च कड़े प्रबंध करने आस्तै आखेआ जेहदे आस्तै बन्ने कन्नै लगदे कस्बें, दुए क्षेत्रें च कड़ी तक्क रखने दी लोड़ ऐ तां जे चुनां शैल ढंगै कन्नै मुकम्मल होई सकन।

<><><><><><>

Samba Border Areas

जिला चुनां अधिकारी सांबा अभिषेक शर्मा होरें कल अगेत्री चौकिएं—सुरेश नांगा, रामगढ़ ते कन्ने लगदे क्षेत्रें दे मतदान केन्द्रें दा दौरा कीता। इस दौरे दा मकसद होने आले लोकसभा चुनां 2024 बारे तैआरिएं ते सब्बै बुनियादी सुविधाएं दा जायजा लैना हा। जानकारी दित्ती गई ऐ जे एयर कंडीशनर कन्नै लैस 2 बंकर— इक रामगढ़ ब्लाक च ते इक सुचेतगढ़ ब्लाक च स्थापत कीते गे न। इनें बंकरें दा इस्तेमाल पाकिस्तान शैलिंग दरान आम लोक करगंन ते सामान्य हलातें च इनें बंकरें गी लाइब्रेरी, जिम ते दुए मनोरंजनें आसतै इस्तेमाल कीता जाई सकदा ऐ।

<><><><><><>

Mehndi SVEEP

जम्मू कश्मीर च चला'रदे स्वीप कार्यक्रम तैहत इक रंगारंग मेंहदी प्रतियोगिता दा आयोजन उधमपुर दे रथियां पंचायत दे आंगनवाड़ी केन्द्र च कीता गेआ, जेहदे च आंगनवाड़ी कर्मचारिएं बधी—चढ़ियै हिस्सा लैता। आकाशवाणी जम्मू दे संवाददाता नै दस्सेआ जे इस कार्यक्रम दा आयोजन मतदाताएं गी जागरूक करना हा, जेहदा नारा "Let us vote and Let us build our Nation" यानि आओ वोट पाचे ते अपने देश गी मजबूत बनाचे। इस कार्यक्रम दा आयोजन जिला चुनां अधिकारी उधमपुर सलोनी राय हुंदी दिक्ख—रिक्ख च कीता गेआ। इस मेंहदी प्रतियोगिता दरान प्रतिभागिएं चुनां च भागीदारी, नागरिकें दी जिम्मेदारी ते लोकतांत्रिक नियमें कन्नै जुड़े दे नशाने दा इस्तेमाल करियै मेंहदी दे डिजाइन बनाए।

<><><><><><>

JK Highway Closed

जम्मू-श्रीनगर राष्ट्रीय जरनैली शिड़क अज्ज बडलै भारी बरखा दे चलदे रामबन च पस्सी पौने करी बंद करी दित्ता गेआ ऐ।

<><><><><><>

Lajja

आकाशवाणी जम्मू दियां अपने समें दियां मन्नी परमन्नी दियां समाचार वाचिका लज्जा मन्हास हुंदा काल होई गेआ ऐ। लज्जा मन्हास 6 दिसम्बर 1971 गी जम्मू रेडियो स्टेशन पर डोगरी खबरें दा प्रसारण शुरू होने पर खबरा पढ़ने आले पैहले समाचार वाचकें चा ओह इक हियां। 70 कोला 90 दहाके दरान लज्जा मन्हास होर डोगरी खबरें दी पूरक रूपै च पंछान रखदियां हियां। उंदा खीरी संस्कार अज्ज दिने 1 बजे जम्मू दे शास्त्रीनगर शमशान घाट पर कीता जाग। आकाशवाणी कन्नै जुड़े दे केई लोकें उंदी मौती पर गैहरा दुख प्रगट कीता ऐ।

<><><><><><>

Tawi Lok Utsav

जम्मू कश्मीर कला संस्कृति ते भाषा अकादमी नै इंदिरा गांधी राष्ट्रीय कला केन्द्र जम्मू कन्नै रलियै 3 ध्याड़े दे तवि साहित्य लोक उत्सव दा आयोजन कीता। क्षेत्रीय साहित्य ते संस्कृति गी उजागर करने आले इस उत्सव दा आयोजन जम्मू दे अभिनव थैटर च कीता गेदा ऐ। संस्कृति विभाग दे प्रधान सचिव सुरेश कुमार गुप्ता होरें डिवीजनल कमीशनर जम्मू रमेश कुमार ते संस्कृति विभाग दिएं सचिव दीपिका कुमारी हुंदी मजूदगी च इस उत्सव दा शुभारंभ कीता। इस मौके बोलदे होई प्रधान सचिव होरें आक्खेआ जे इस उत्सव दे आयोजन दा मकसद जम्मू कश्मीर दी सांस्कृतिक विविधता ते साहित्यिक विरासत गी आपसी मेलजोल दे बाधे कन्ने अगगे लेना ऐ जेहदे आस्तै सांस्कृतिक पेशकशां ते बक्ख-बक्ख क्षेत्रें च प्रतियोगिताएं दा आयोजन कीता जा'रदा ऐ। उत्सव दे पैहले रोज मन्ने परमन्ने दे लखारिएं आपसी मेल मिलाप कीता, मुशायरें, लोहकी कहानी सुनाने दे सत्र दा आयोजन कीता गेआ ते किश किताबें दा विमोचन बी कीता गेआ। कार्यक्रम दा मुख् आकर्षण पाड्डर थमां आए दे कारीगिरें तरफा बकरी दी ऊन दे इस्तेमाल कन्नै बेहतरिन मकामी बुनाई ते कताई दी कला दा प्रदर्शन रेआ।

<><><><><><>

LG-JATF

उपराज्यपाल मनोज सिन्हा होरें कल मुंबई आधारित इक गैर सरकारी ते गैर कारोबारी संगठन जेएटीएफ जेहड़ा शिक्षा राएं नोजवानें दे सशक्तिकरण दे कम्मै च लग्गे दा ऐ, ओहृदे मिंबरें कन्नै गल्लबात कीती। उपराज्यपाल होरें नोजवानें गी उंदे सुखने गी मूर्त रूप देने च मददर करने लेई संगठन दी सराहना कीती। उपराज्यपाल होरें उनेंगी आक्खेआ जे ओ समाज दे हर तबके दे सामे ते पूरे पराते विकास लेई कम्म करदे होई ओह शिक्षा, ज्ञान ते समर्थ विकास पर ध्यान दिंदे, होई उनेंगी जिम्मेदार शैहरी बनाने जे अपने पैरे पर खड़ोने लेई हुनरमंद बनाने लेई सांझे जतन च बी सैहयोग देन। जेएटीएफ दे चेयरमैन विनोद दुग्गल, प्रधान नरेन्द्र मेहता ते होर दुए औहृदेदार बी मजूद हे।

<><><><><><>

Poonch

पुंछ दे जिला विकास कमीशनर यासिन मोहम्मद चौधरी होरें कल बक्ख-बक्ख मैहकमें दे अफसरें, सिविल सोसायटी दे मिंबरें ते बक्ख-बक्ख धार्मिक संगठनें दे प्रतिनिधिएं कन्नै इक बैठक लाइयै ओंदे ध्यारें जिंदे च बसाखी, शब-ए-कदर, नराते ते ईद-उल-फितर शामिल न, लेई तैआरिं दा जायजा लैता। बैठका च शामिल प्रतिनिधिएं ध्यार दरान बिजली-पानी दी बवस्था, साफ सफाई, गड्डिडएं दी आओजाई ते होरने बंदोबस्तें गी जकीनी बनाने दा मुद्दा पुट्टेआ। डिप्टी कमीशनर होरें खुराक ते उपभोक्ता मामले सरबंधी मैहकमे गी बी निर्देश दित्ता जे ओ ध्यारे दरान बजारें च खाने पीने आलिएं चीजें बस्तें ते होर दुए समेयान दे मयार, उंदे भाएं ते दस्तेयाबी पर तक्क रखन। उनें बिजली, पानी ते होरने मैहकमें गी बी सब्बै बंदोबस्त समें सिर करी रखने दा बी निर्देश दित्ता।

<><><><><><>

Girls Self Defence

किश्तवाड़ च जिला प्रशासन आस्सेआ “बेटी बचाओ, बेटी पढ़ाओ” अभियान तैहत बच्चिं गी आत्मरक्षा लेई ताइकवांडो दी सिखलाई देने दा इक म्हीने दा कार्यक्रम कल सम्पन्न होआ। किश्तवाड़ थमां आकाशवाणी दे संवाददाता नै जानकारी दित्ती ऐ जे 14 कोला लेइयै 18एं बरें तोड़ी दी उमरी दिएं कुल 80 कुड़िं इस सिखलाई अभियान च हिस्सा लैता ते आत्मरक्षा दे गुर सिक्खे। इस मौके बोलदे होई डीसी किश्तवाड़ डॉ. देवांश यादव होरें आक्खेआ जे नेह कार्यक्रमें दे आयोजन कन्ने कुड़ियां च आत्म रक्षा दे कौशल गुड़े होंगन ते उंदा व्यक्तित्व बी निक्खरग। नेह विकास कन्नै एह कुड़ियां अग्गे चलियै कामयाबी ते मान-इज्जत कन्नै जिंदगी जीह सकदियां न।

<><><><><><>

IPL

आईपीएल क्रिकेट च कोलकाता नाईट राइडर्स नै जंदी रातीं बेगलुरु दे एम.चिन्नास्वामी स्टेडियम च रॉयल चैलेंजर्स बैंगलोर गी 7 विकटें कन्नै हराई दित्ता। पैहले बल्लेबाजी करन उतरी दी बैंगलोर रॉयल दी टीम नै विराट कोहली दे 59 गेदें च 83 रंजें दी मदाद कन्नै तैह 20 ओवरें च 6 विकटें पर 182 रंज बनाए। एह्दे परते च कोलकाता नै शडे 16 ओवरें ते 5 गेंदें च 3 विकटां मुआइयै एह लक्ष्य हासल करी लैता। वेंकटेश अय्यर नै 30 गेंदें च 50 रंज बनाए। कोलकाता नै आईपीएल दे इस संस्करण च हुनै तगर खेड्डें गेदे दौनें मैचें च जित्त दर्ज कीती ऐ। उत्थें गै रॉयल चैलेंजर्स बैंगलोर नै अजें तगर खेड्डे गेदे त्रऊं मैचें चा शडा इक मैच गै जित्ते दा ऐ। अंक तालिका च कोलकाता दूई जदके राजस्थान रॉयलस त्रीये नंबरै पर ऐ। चेन्नई सुपर किंग्स सब्बने शा उप्पर पैहली थाहरै पर ऐ।

<><><><><><>

Ramban Mishap

पुलसै जंदे रोज रामबन जिले च बैटरी चश्मा कश पेश आए दे सडक हादसे च मरोने आलें दी पंछान करी लैती ऐ। रामबन थमां आकाशवाणी दे संवाददाता नै जानकारी दित्ती ऐ मारे गेदे 10एं जनें च 9 बिहार थमां आए दे श्रमक हे जिसलै जे गड्डी दा डरैवर जम्मू जिले दे अम्ब गरोटे दा रौहने आला दस्सेआ गोआ ऐ।

<><><><><><>